



## A Sèn Nicolò

Simon de Giulio da Penia l ve lejarà jù ades na pìcola poejia ades metuda insema da el instes che la se intitola 'Al Bambin Gejù'.

Un an de pien jené  
te na cèsa son ruà  
de jent rica, scioldi a sté  
e un bez soul ma mèl usà.

Te stua l'era ló sul fon  
un muge de èrc da fèr damat,  
un aeroplano, un gran camion,  
na ferata e un bel musciat.

De bie archi, na pistola,  
un arlechin tant bel vestì,  
na gran popa con guant de viola,  
na trombeta e un pé de schi.

«Chi che l'è stat che te à portà  
chisc bie èrc? Dilo a mi».  
«Bambin Gejù chiò l'è passà  
che l'è apena chinesc dì».

Te n'otra cèsa l dì dò  
per zeche afari son ruà,  
père e mère era ló  
con cinch bec e povertà.

Chisc picui bec i ven in cà  
Con de sbiaca un pìcol cian:  
«Gejù Bambin n'è l'è portà  
e un dì per on, senza bacàn.

No sion stac propio valenc  
che ence na reta l ne à portà  
ma lo stescio sion contenc  
e ge volon ben a nosc papà.

A chest bez chiò de sora  
un muge de èrc l ge à portà,  
l ne fèsc gola, l ne grigna fora  
ma che l sie più valent nesciugn l sà.»

I à scomenzà dapò a jìer  
con so cian bel inlacà.  
E a chisc bec g'è amò cognù vardèr  
lumenousa na lègrema ge era ciutà.

Che pian ju per chela palida massèla  
lasciando l sen la vegnià jù per mez...  
«Ma oh vita,» é dit «no ti es ne giusta ne bela



da fin timpruma con vèlch pìcol bez!

Bambin Gejù, gé chest l spere,  
de veder amò fin che son vif  
che l pìcol bez, del rich o del pere,  
ciape ti doni duc l valif».